



PERSEVERA

Un página di kurashámentu i guia spiritual pa miembronan di Scouting Antiano



Òktober 2011

Edishon 9 Aña 1

Nos Tata

E parse, pero no ta mesun kos...
E orashon di 'Nos Tata' tambe ta kontené hinter evangelio.
E ta e orashon mas sublime ku hamas a ser pronunsiá.
E ta hinter un programa di bida kristian.

Pasobra e orashon no ta e palabranan, sino e afekto i aktitut ku kua bo ta pronunsiá nan. Kada frase tin ku bai kompañá di un gran amor i konfiansa den Dios i di un kompromiso personal di kolaborá ku Dios, p'asina loke nos ta pidiendo ser realisá.

E introdukshon: "Nos Tata ku ta na shelu" mester tin ku bai kompañá di un gran ternura i entrega amoroso i konfiá na Tata.

Nos no por pidi laga Reino di Dios bini, si mi bida ta unu kontra reino; i impliká mi kompromiso pa traha pa konstruyé, mehorando, den loke ta dependé di abo, e relashonnan rondó di bo den kua bo ta biba i apoyando tur grupo i tur polítika ku ta traha den e direkshon ei, pa ekstendé hustisia i solidaridat-fraternidat.

Ta p'esei, mi mester asumí komo guia di mi bida e boluntat di Dios òf mandamentu úniko di e amor ilimitá na tur hende. Únikamente hendenan nobo di e amor por konstruí e Tera Nobo di Reino.

Mi mester tuma masha na serio kua destino mi duna mi biennan ku a sobra, pa kolaborá den e tarea di ku e 'pan' ta yega na



tur esnan den nesesidat; no ta basta ku un limosna chikí.

E kontrishon konstante dor di fayonan ku nos ta kometé ta pone nos den e aktitut generoso di pordoná tur hende ku a falta nos den algu, p'asina ku e koriente universal aki di pordon- amor ta kaba ku tur guera i violencia.

Hopi ta e malu i sufrimentunan ku ta eksistí riba tera i, ora resa e orashon aki, bo tin ku komprometé bo mes pa nunca no hasi malu na ningun hende i traha pa laga e malunan eksistente disparsé.

I masha importante: tin un tentashon ku ta rondoná nos konstantemente i ku por kibra tur e grandioso proyekto aki: e tentashon di egoismo personal i di grupo. Tentashon ku bo tin ku komprometé bo mes pa vigilá i rechasá dia pa dia.

Solamente ku e aktitut i kompromisonan aki nos tin e derecho na resa Nos Tata. i únikamente asina bo lo logra e promé petishon: ku hinter mundu, ora e savoriá maravia di Tera Nobo, lo santifiká i alabá ku hinter su kurason Nòmber di Dios ku a hasi tantu maravia.

Matías Castaño, Saserdote



**O Señor, nos Dios, esta glorioso bo Nòmber ta den mundu henter!
Si, bo splendor ta alsá te riba shelu! (Salmo 8:1)**